



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 8

Sharad Pawar-i maneni
NCP Tir inyaksü

Küm 33 sülen Napoli-i
Serie A takok ngutetogo



VOL. XX NO. 203 (ADOK 203)

DIMAPUR

KÜPTOKNÜ (SATURDAY)

MONUPII (MAY) 06, 2023

₹ 5.00

CM Rio-i department ajak renema atatsü tuyu

Dimapur, May 5, 2023 (TYO): Chief Minister Neiphiu Rio-i sorkar department ajak dang tzungluruwa mapang alima lendong balala atema renema atatsü metetdaksüogo.

CM Rio ya Nagaland State Disaster Management Authority (NSDMA) indang chairman lir aser pai tanü monsoon preparedness meeting ka ayonga amendang public nem tsungsang-mopung osang sangoktsütsü aser local level nung osangtsüsang prokshitsü indang jembu.

"Gari lenmang tajung den kilentzü ayimdak shitak ayutsüla anungji Public Works Department (Roads and Bridges), National Highways aser Infrastructure Development Corporation Ltd. ajanga teinyaksü mapatem inyaksüla" ta Rio-isa ashi.

Paisa bangdak department den asingdangteperem ang lenmang nung cables enoktsü ayongzük.

CM Rio-isa home guards,

Civil Defense aser State Disaster Response Force dang jungjunga training agitsü aser renema alitsü tetuyuba agütsü.

Health & family welfare department-ia medical emergencies nung amshiba mozütem shitak ayutsü atema CM Rio-i ashi.

Paisa PHED dang tzungluruwa mapang tziü tajemtsü peria ayutsü aser Food & Civil Supplies department dang district o yimtsüngtem nung aliba godowns o stores nung jangotsü teperi ayutsü ashi.

"Alima lendong aika nisungtem ajanga adokdaksür aser asenoki lenmang aser kilentzü ayimdak jungjunga anepalura lendong tulu nungi kümzüktsü" ta Advisor to NSDMA, Z Nyusietho Nyuthe-ia senden nung ashi.

Iba senden nungsa NSDMA, PWD(R&B), NHIDCL, HG & CD/SDRF, Health & Family Welfare department temi PowerPoint presentation sayu.

TR Zeliang-i gari lenmangtem atema senden amen

Dimapur, May 5, 2023 (TYO): Nagaland Deputy Chief Minister TR Zeliang-i Honibarnü National Highways (PWD), National Highways Infrastructure Development Corporation Ltd. (NHIDCL) aser Border Road Task Force (BRTF) den külem senden ka ayonga menogo.

Taoba Chief Minister TR Zeliang-i National Highways mapa agizükba sülen Nagaland nung road projects implementing agencies ajak külem senden tanü mezüing ayonga amen.

"DPR specifications aser

Contract Agreements nung aliba ama NH, PWD, NHIDCL aser NRTF ajanga gari lenmang mapatong ajak mapang shitak nung renemtsü metetdaksür" ta TR Zeliang-i ashi.

"Nagaland nung gari lenmang ajak ya nübortem ajangzüktsü atema alizüing yur yanglutsüla. Minister In-charge ka ama ni State sorkar aser nübortem dang Nagaland nung National Highways indang osang mapang shia ashitsüla anungji lenmang tajung ayutsübaji kü indang nukjidong lir" ta paisa metetdaksü.

Nagaland nung telok balalai Manipur nung azütokshitepba aitsür

Dimapur, May 5, 2023 (TYO): Nagaland nung Arogotem dena telok balalai Manipur nung azütokshiba aitsüogo aser yimjung bener arutsü tayongzükba agütsür.

Naga Hoho-i sangdong ka nung lendong balala atalokba aser tapayutsü takümtem samaba den kiojentem raksatsüba atema süoki ia bilemba metetdaksü.

"Manipur state sorkari 'shoot-at-sight' tetuyuba agütsüba aitsür kechiyong iba nung lendong tulu keta lir. Tashiyim amshiba ajanga tensa tamajungba akümstü aser azütokshi talila ataloktsü. Anungji state sorkari tensa süngjemtsü atema iba tetuyuba meyipa agitsü ayongzük" ta Naga Hoho-i ashi.

"Manipur nung tai maketerem dak teka sangshiba aser talisa Khristantem tepsetba, tenla kitem rongdoktsüba aser nija kitem

raksatsüba aitsür" ta Ao Baptist Arogo Mungdang (ABAM)-ia sangdong ka nung metetdaksü.

"Iba inyakyim ajanga tamangba yimsü aser lokti nung meputep tali adoktsür anungji yimjung nung alitsü ayongzük. Tamangba yimsü ka aser kin ka samatsütsü atema inyaksangshiba angudang temulung raksar" ta ABAM-isa ashi.

Christian Forum Dimapur (CFD)-ia tanga sangdong ka nung tai maketerem dak tenük yoka mapa tamajung inyakba aser pei tamangba yimsü aser kin atema reshikangshiba atema temulung raksaba metetdaksüogo.

Manipur nung ozüing alema mapa, inyakba nisung tepsetba aser tashiyim mapa inyakbatem aitsür. Tamangba yimsü amangtsüba ya meimchir

temeten ka lir aser tamangba yimsü nung ajemdaker inyaksangshiba ya magizükter ta CFD-isa metetdaksü.

Tenla aika rongdoktsüba aser raksatsüba atema temulung raksar. Centre aser Manipur state sorkartemi tanga iba mapa ya aziüktsü ayongzük, ta parnokisa ashi.

Naga People's Movement for Human Rights (NPMHR)-ia nisung tepsetba aser ozüing alema mapa inyakba anentsü ayongzükogo.

Lokti lennirtem aser MLA temi tensa süngjemdaksütsü aser sendaktepa alirtem den olemtem tenzüktsü ayongzük, ta NPMHR-i sangdong ka nung ashi.

Nisung taküm samaba atema mang ayimer aser lokti nung telemsa adokba atema sasa bilemer, ta NPMHR-isa ashi.

Manipur kübok district 4 nung tensa azüokogogo: Indian Army

Imphal, May 5, 2023 (Agencies): Manipur kübok Churachandpur, Kangpokpi, Moreh aser Kakching nung tensa azüokogogo ta Indian Army indang Spear Corps (III Corps) ajanga metetdaksü.

"Mapang shitak nung mapa inyakba ajanga tensa azüokogogo aser yasing nungi ozüing alema inyakba tatalokba kecha mali" ta Spear Corps-isa ashi.

Tesüiba ghonda 12 tsüingda Imphal East aserr West district

tem mi senoktsüba aser mokdang ayongtsü merangba atalokogogo ta Indian Army-isa ashi.

Tang tashi nung civilians 13000 tashi kümzükogogo aser parnok khen atema military premises nung anenzükdakja lir, ta parnokisa metetdaksü.

Hokolbarnü nisung telok kati MLA Vungzagin Valte amakdang pa yirua mozü kidang anepaludar saka pa temang tajungba kümogogo.

Manipur director general of

police (DGP) P Doungel-i nübortem dang süngjema alitsü aser tensa meraksatsü mepishia metetdaksüogo.

"Nübortemi police aser sorkari mepishiba tashi angatsüla kechiyong Army indang inyakyim balaka lir. Army-i police ama meinyaker. Army-i tsükchirtem den raratsü atema training agir saka police-ibo nübortem azüoktsü atema training agir" ta DGPP Doungel-isa ashi.

Advisor Imkong-i Arlla 371A meyipa reprangshitsü nenshir

Kohima, May 5, 2023 (TYO): Nagaland State Assembly-i ali aser rongsen indang ozüing jungjunga meteta ayutsü atema Arlla 371A meyipa reprangshitsü nüngdaker ta Soil & Water Resources and IPR Advisor Imkong L. Imchen-i Honibarnü ashi.

Arlla 371A ya angatetsüsa rasa mali aser talisa Clause IV atema Centre aser state sorkartem tsüingda terata ka nung lir ta pai ashi.

Ali aser idakji aliba rongsen ta asüba indang jungjunga lateta mali aser iba jagi Centre o state sorkari oil & natural gas atema inyakyim latettsüba nung timtem ajurur, ta Advisor Imkong-isa ashi.

Arlla 371A indang Clause IV nung ali kibur aser ali o idakji aliba rongsen agütsübaji nübor meyong ta shia lir. Parliament-i Petroleum and Natural Gas dak sendakba ozüingtem Nagaland nungbo mapa küma meinyaksü ta July 26, 2010 nung NLA-i bangzüngtepa lir, ta paisa metetdaksü.

"Ali telung nung aser tema

nung aliba ajak Naga nunger meyong ta angateta Nagaland sorkari 2012 nung Nagaland Petroleum and Natural Gas Rules & Regulation yanglu aser iba ya Nagaland nung oil exploration nung temulung agüja yangluba lir. Iba sülen district 11 nung oil and gas fields 11 aliba nung mapa inyaksü atema company tem dang nungi "Expressions of Interest" meshi. Ajisüaka Centre sorkari iba ya ozüingi memelar ta ashi aser state sorkar dang exploration masütsü tetuyuba ajanga aser terata adokbaji iba ya lir" ta Imkong Imchen-isa ashi.

"Arlla 371A ajanga Nagaland Assembly nem mineral oil maparen inyaksü atema tashi magütsür" ta 2012 MHA memorandum nung shia lir.

Ajisüaka MHA indang office memorandum ya tim masü, mapa küma inyaka moutettsü aser tashiyim keta renemba lir, kechiyong Nagaland Assembly-i kodanga Mines and Minerals (Regulation and Development) Act 1957 mulunga agizüka mali, ta paisa metetdaksü.

NLA nung züingsem 60 prong külemi bangzüng ka renemer Centre sorkar dangi mebenra Arlla 371A ya nüngdak mali akümer. Iba ya ozüingren onük ka lir aser ozüingi melaba ama inyaksüla, ta paisa shisen.

"Iba ya legislative ken o ka asünung NLA-i Centre sorkar dangi abentsüla mesüra Supreme Court nung PIL ka benoktsüla. Züingsem 60 prongi dang mulungra Leader of the House-i Arlla 371A meyipa reprangshi aser Constitution nung teteziü keta enoktsü atema shidangtsüla" ta Advisor Imkong-isa ashi.

Constitution nung tenokdangba kecha magütsür mesüra meinprong kecha mesüi Naga nunger atema 'special provision' ya enoksem anungji tanü tashi Constitution nung Arlla ajak indang tashi lir ta paisa ashi.

Assam aser Nagaland chief minister temi disturbed area belt nung oil exploration atema MoU nung sign süteptsü mulungba nung Centre sorkari mulunga agizüktsüla kechiyong iba ya Constitution nung dena lir, ta Imkong Imchen-isa ashi.

OFFICE OF THE
Ao Students' Conference (AKM)
H.Q. Mokokchung - 798601 : Nagaland
"For the Nation"
METETDAKTSÜR

Manipur State nung koba All Tribal Students' Union of Manipur (ATSUM)-i ayongba senden mapang meimlaba lendong tulu kin kati kin ka anema tesem balala nung nisungtem jenti timtem tesama balala ajurudagi, AKM-i kanga sasar. Ano tensa mesüngjemteti tesem balala nung mangatetep adokba manener. Iba dak sendakba nung Mokokchung district nungi Kaketshir aser Aor Kaketshir kwika Manipur nung University aser institution balala nung züingdagi tsüraburtem mesüra kaketshir ajaki pei tenüing tejangja aser contact no AKM nem agütsütsü mepishir.

Teküboklen agüja aliba Contact No. den tongteprateptsü mepishir.

- 1) Sb. Satemmongba (7005629385)
Gen. Secy., AKM
- 2) Sb. Onenpong (7005740523)
Vice President, AKM
- 3) Sb. Bendangnangba (7085652415)
Info. & Publicity Secy., AKM

Kaketshir wadang nung ,

Sd/-
(Sb. Lanutoshi Aier)
President

(Sb. Satemmongba)
Gen. Secretary

MLA Nuklutoshi-i tenüngsang agütsüba sentong agi



Chuchuyimlang yimtak Anü Mai Amphitheatre nung MLA Nuklutoshi-i election nung takok anguba asoshi tenüngsang agütsüba sentong May 5, 2023 nü agidang tangokba aser Unger Women Wing-i ken atandang tangokba noksa nung angur.

Impur, Monupii/May 05 (TYO): Tanü Chuchuyimlang yimtak Anü Mai Amphitheatre nung MLA Nuklutoshi, 14th Nagaland Legislative Assembly election nung takok anguba asoshi tenüngsang agütsüba sentong ka agiogo.

MLA Nuklutoshi ya 22nd Arkakong Assembly Constituency nungi adok aser tanü iba sentong nung pa phukumertem aser National People's Party (NPP) nungi lenirtem aika adenshia kanga akhum keta agiogo.

Tanü iba sentong nung MLA Nuklutoshi-i jembidang election nung nüburtemi pei molungba candidate yariogo, aji süaka nübur tenzüksü asoshi maoangka ngutet nung Arkakong nung lenir ka ama Arkakong nung shinga mebandangi liromedema

yaritsü temelungtetba lir, anungji item mapatemji takok ngua inyaksü asoshi Arkakong nüburtemi nungita yaridaksüner, ta ashi.

Tanü putu nung lanur takotet zünger mapa mongui alir jenti lir, kidang mena mekazüi alima koleni aor ibaji repranga nüchi akumtsü lenmang bushia merangtsüla, aji asünung atsü-ayong mesüi pa dangi arua khuret lemsatepra akokba lenmang ajak nung yaritepa inyaksü, anungji lanurtemi atapisa meli-i arutsüla, ta MLA Nuklutoshi-isa Arkakong lanurtem ajungmesoa ashi.

Kasa sentong nung Riongsanger Putu Chuchuyimlang, Chuchuyimlang Senso Mungdang tir S.T. Noktang Longkumer; T. Yashi Lkr,

Yaongyimsen; O .Shilu Changtongya Town; Tiashilu Akhoya; Kilengmen Unit nungi Limasangwa Unger; Aodangit aser Akum Jamir, Advocate, panoki o tatsütsü jembiba den tarur pela agizükba o NPP Arkakong AC tir Moakumzük-i jembia liasü.

Sentong nung tepela o NPP Chuchuyimlang unit nungi jembiba den Unger Women Wing ajanga ken tajung ka tena lokti saksalemdaksü aser sentong nung Tsüngrem leniba jazüka Yaongyimsen Baptist Arogo nungi pastor Chuba Aier-i sarasadema liasü.

Maneni sentong nung Tsüngrem tadenba asoshi Chuchuyimlang Baptist Arogo nungi pastor Rev.T.Lima-i sarasadem aser kongro Imnasenla ketdangsuba nung iba sentong agia liasü.

ULB election magiba ajanga senotsü teyari mangur: Advisor Zhaleo

Dimapur, Monupii/May 05 (TYO): Urban Development Directorate, Kohima nung aliba Conference Hall nung May 5, 2023 nü SBM-U2.0 coordination meeting cum training on CSAP and CSWAP plan implementation, strategies formulation, and mobilization of SBM Projects for 39 ULBs sentong ka Advisor, Urban Development and Municipal Affairs, Zhaleo Rio den agia liasü.

Iba senden nung jembidang, iba senden aser training sentong nung dentetba ya maangka tulu lir, kechiaser state nung Urban Local Bodies dak sendakba Administrator asoshi tongtipang senden ka lir, ta Advisor Zhaleo Rio-i ashi.

Pai iba senden nung aliba Administrator tem dang maangka ya agia yimya metettsü ayongzük, kechiaser department indang scheme balala parnoki ang mapa kuma inyaksü, ta ashi.

Urban Local Bodies ketdangsuba aser anepaluba nung administrative officer temi akok tashi tajungtiba nung inyaksü imlar, ta pai ashi.

Taoba mapang ULB 19 dang liasü saka tangbo 39

kumogo aser ministry nungi senotsü agütsüba ya taoba ULB 19 atema dang lir aser department ajanga itemji ULB 39 prong nem lemsatsür, ta pai ashi.

Sorkari ULBs nem facility aser nungdakba ki-o-jen agütsütsü atema jembir, kechiaser ULB kar nung revenue bendener aser kar nung mebandener aser revenue bendenba nungi ULBs nung mapa inyaker nem itasen magütsütetba asoshi tezü atanger, ta ashi.

Zhaleo-i ULBs ajak nung staff kwi ali aji metetnüa ashi aser jila tuluba süaka nütsüng yongsük peria alidak revenue peria angur aser tajungba inyaktettsüla, anungji Administrator temi temolung agüja scheme balala mapa kuma inyaksüla aser revenue tajungba bendena nüburtem nem facilities aser amenities tajungba agütsütsüla, ta Advisor Zhaleo-i ashi.

Administrator temi temolung agüja mapa inyakra department-i sen lemsatsütsü, ta ashi.

Labor contract atema department-i lenmang bushiba mapang lir aser maneni jembishinütsü. Administrator

temi local MLA tem den jembishinüa sentongtem yanglutsüla, ta pai ashi.

State nung UBL elections magitetba ajanga senotsü nung timtem lir, aser sorkari iba ken o nung temolung agütsür aser Naga nungeri amalitep akaba ajanga asenoki Municipal Act ya yanglushitsü aser election ya agütsüsa, saka ULB Administrator temi nüburtem asoshi maneni inyaksüla, ta pai ashi.

Public Park tem yanglutsüba dak sendakba nung pai programme officer tem dang tesem jangjatsü ajungshi aser ali ya angati asütsüla aser ali ya tenla agütsüba süang, mesüra aliba süang, kuli kaket shidak alitsüla aser tarutsü nung mangatetep madoktsü mechi MoU alitsüla, ta ashi.

Iba senden tenzüka Elizabeth Ngully, Additional Secretary aser Mission Director, Swachh Bharat Mission Urban ajanga metetpela mapang agia liasü aser senden tatemlen SWM Methods and Technologies, UWM Methods and Technologies amala indang jembia liasü.

ASLB-i metetdaksür

Dimapur, Monupii/May 05 (TYO): Ao Senden Literature Board-i Item tesem nung achaayanga agiba Arangtet Tongtepratepa tatidang shiyim Tatidang 2023 Shiyim (form) agia nungzüluoktsü (admission) sangdonger. a) Kohima Mr. Aotemjen Jamir (M/No. 8731821467) b) Dimapur Mr. P. Alem Jamir (M/No. 7005501457) c) ASLB office (9436436180 & 9089816427)

anogo atsülangtsür, ta ASLB sangdong ajanga ashi.

CoSL senden May 10 nü amentsü

Dimapur, Monupii/May 05 (TYO): Dr. Sukhato A. Sema, MLA aser Chairman, Committee on Subordinate Legislation, Nagaland Legislative Assembly Committee senden May 10, 2023 anüngdang 11:00 ako nung

amentsü, ta metetdaksü. Iba senden ya Assembly Secretariat indang Committee Room nung amentsü. Committee züngsem ajak iba senden nung medema arua adentsü ayongzük, ta sangdong ajanga ashi.

Nagaland nung e-LISS Software training agütsü

Dimapur, Monupii/May 05 (TYO): Department of A.H & Veterinary Services ajanga Directorate nung aliba Integrated Sample Survey indang staff ajunga atema E-Livestock Integrated Sample Survey Software (e-LISS Software) training ayongzüka liasü.

Ibai Guwahati nung April 27 & 28, 2023 anogotem 'Two Day Training on eLISS for State Nodal Officers and District Nodal Officers for NER' agiba indang follow-up training ka liasü.

eLISS software nungya web

portal aser Android-based application lir, koba digital yimya nung Major Livestock Production (MLP) data bendenba nung amshir.

Integrated Sample Survey (ISS) kübok bendenba data aser statistics tem inyakyim balala nung kanga tongtipang süa amshiba indang Director, A.H & Veterinary Services ajanga ashi.

Iba app nung bendenba data ya sentong balala yanglutsü atema kanga tongtipang lir, koba state aser central budget yangluba nunga kanga tongtipang lir, ta pai ashi.

Dimapur DPDB senden nung CCTVs inoktsü indang jembir



Deputy Commissioner, Dimapur indang Conference Hall nung May 5, 2023 nü Dimapur District Planning & Development Board senden amendang tangokba noksa ka nung DPDB Dimapur mendenpuba Moatoshi Longkumer den Advisor Tovihoto Ayemi aser Advisor Hekani Jakhalu nungertem angur.

Dimapur, Monupii/May 05 (TYO): State nung 14th Nagaland Legislative Assembly indang elections agir Dimapur District Planning and Development Board senden mezüngbuba May 5, 2023 nü Advisor, Moatoshi Longkumer lenisüba kübok agia liasü.

Iba senden nung Advisor Tovihoto Ayemi aser Advisor Hekani Jakhalu nungera dena liasü aser DPDB Dimapur indang chairman, Moatoshi Longkumer-i benokba onük balala jembia liasü aser item rongnung Dimapur district kübok dokan ajak aser yimtung nung CCTV inoktsüba indang onüka jembia liasü. Iba dak sendakba nung DPDB Dimapur mendenpubai department

ajungai pei office nung mapang telatet ka tsünga CCTV inoktsü nungdaker, ta shia liasü.

Street lights atema Commissioner Police ajanga sorkar dangi abentsü senden nung molunga lemtet.

Ano iba densen nung tongtipang onük ka jembibaji yimti tebour raksaja cable wire mesangshia aliba aser telephone post songa aliba indoktsüba indang liasü. Iba dak sendakba nung district administration ajanga Cable TV agütsür ajurua aser SDO (C) ajanga field visit ogo aser inyaksü sentongtem yanglua lir, ta Deputy Commissioner, Dimapur, Sachin Jaiswal, IAS ajanga metetdaksü.

(Maneni tapak 8 nung...)

SCO senden nung India aser Pakistan na tsüngda kati ka aitsütep



May 05, 2023 nü Goa nung Shanghai Cooperation Organization (SCO) nungi foreign minister tem senden jakdang India Foreign Minister S. Jaishankar aser Pakistan Foreign Minister, Bilawal Bhutto Zardari na noksa ka tangokba noksa nung angur.

Benaulim (Goa), May 05 (Agencies): Hokolbarnü Goa kübok Benaulim nung Shanghai Cooperation Organisation (SCO) Foreign Minister tem senden nung India aser Pakistan na tsüngda kati ka aitsütepogo.

Iba senden nung jembidang India External Affairs Minister, S Jaishankar-i Pakistan metetshiyonga iba linük aija kiralongraba anema inyaksü ayongzük aser Pakistan Foreign Minister, Bilawal Bhutto Zardari-i yimtenren nung tajangzük angutsü atema kiralongra onük ya hadir ka ama amshiba atema India aitsü.

Jaishankar-i, kiralongra mapatem atema senotsü lenmangtem nokdangtsüla, ta ashi aser Bhutto Zardari-i Kashmir dak sendakba nung international ozüing alema inyakba aitsü.

SCO inyakyim nung linük ana tsüngda onüktem kaktetsü memelar, ibayongji India aser Pakistan foreign minister nati linük tenüngo metetshi.

Iba senden nung mendenbuba Jaishankar-i, iba telok (SCO) security atema kiralongra tera nungi kakteta

indoktsü nungdak; alima nung coronavirus wara aser iba wara ajanga tayongzükba balala ajangshiba mapang nung kiralongra ajanga maneni timtem agüja liasü, ta ashi.

Kasa senden nungji China, Russia, Kazakhstan, Kyrgyzstan, Tajikistan aser Uzbekistan linüktem nungi foreign minister tem-a liasü.

Paisa, "Iba tebilemtsü sendoka yutsüra ibaji ajanga asenoki security tsütsü timtem ajurutsü. Kiralongra medentsütsü makok aser iba tebilemtsü ya nokdangtsüla; iba nungji arrtsü adener kiralongraba densema lir," ta ashi.

Pakistan foreign minister-i, "Linüktemi international ozüing alema pei kijai telemetba agiba aser Security Council bangzüngtem alema inyakba ajanga SCO nükjidongtem raksatsür," ta ashi.

Bhutto Zardari-i ibaji rateta mashiyonga ibaji Kashmir mangatetep dak sendakba olen ka liasü.

India-i SCO foreign minister tem senden ya ayongzükba akar aser tang SCO nung chair ji India lir.

Sharad Pawar-i maneni NCP Tir inyaksü

New Delhi, May 05 (Agencies): Hokolbarnü Nationalist Congress Party (NCP) Tir, Sharad Pawar-i, pai party Tir nungi anentsü telemetba agiba agienadoker, ta metetdaksüogo.

Anogo asem tejaklen pai party Tir nungi anentsü osang metetdakja liasü aser Hokolbarnü osangbenertem den jembidang Pawar-i, pai party nung külem tenzükertemi mepishiba akhümtsübur, ibayongji pai maneni Tir inyaksü telemetba agi, ta metetdaksü.

"Ni parnok tebilemtsü mezüingmeshi mesüner. Kü dang meimba aser tamang katetba ajanga ni kanga pelar. Nenok ajaki mepishiba asadangba den külemi party-i tentetba committee telemetba akhümtsübur ni Tir menden nungi anentsü telemetba agiba agienadoker," ta Sharad Pawar-i metetdaksü.

Pawar-i, "Party organization aintsü atema ni kanga meranga inyaksü aser party tangatetbatem aser

nükjidongtem nüburtem nem metetdaksütsü," ta ashi.

Nationalist Congress Party Tir tasen ka shimtsü atema committee ka tenteta liasü, saka committee jagi Sharad Pawar-i Tir menden nungi anentsü telemetba agibaji magizük, ta Hokolbarnü party lenir, Praful Patel-i metetdaksü.

Committee senden tembangba sülen Patel-i, "Committee-i bangzüng ka renemogo aser pai Tir menden nungi anentsü telemetba agibaji magizük aser maneni pa dang party Tir inyaksü mepishir," ta metetdakja liasü.

Committee nung züngsemtemji Ajit Pawar, Supriya Sule, taoba mapang Union minister Praful Patel aser Chhagan Bhujbal nung liasü.

Sharad Pawar-i Congress party toktsüba sülen 1999 küm pai NCP ya tenteta liasü aser iba mapang nungjagi pa tongti lenir liasü saka Mongolbarnü pai ajungbena Tir menden nungi anentsü telemetba agiba osang metetdakja liasü.

GOVERNMENT OF NAGALAND DIRECTORATE OF INDUSTRIES & COMMERCE

e.mail: industry.naga@gmail.com, e-fax:-:08468825666

ADVERTISEMENT

Dated Kohima, the May 2023

NO.IND/TRG/H-LOOM/87/90-91 (Vol-II) : Applications are hereby invited from indigenous candidates of Nagaland between the age of 15-23 years as on 01-07-2023 and upto 25 years in case of ST/SC candidates with a minimum qualifications of HSLC/HSSLC/SSLC or equivalent examination passed in a single sitting with English as a subject for undergoing 3 (three) years Diploma Course in Handloom & Textile Technology commencing from September 2023 at the Indian Institute of Handloom Technology, Jawahar Nagar, Khanapara, Guwahati.

Necessary detailed information and prescribed application forms may be collected from the office of the Directorate of Industries & Commerce (Dev. Branch, First floor), Nagaland, Kohima during the office hours. The last date for submission of form is on or before 26th May 2023. No separate calling letter will be issued.

(A. Temjen Jamir)

Director of Industries & Commerce

GOVERNMENT OF NAGALAND DIRECTORATE OF INDUSTRIES & COMMERCE

e.mail: industry.naga@gmail.com, e-fax:-:08468825666

ADVERTISEMENT

Dated Kohima, the May 2023

NO.IND/TRG/H-LOOM/87/90-91 (Vol-II) : Applications are hereby invited from indigenous candidates of Nagaland between the age of maximum 24 years as on 01-07-2023 and upto 26 years in case of ST/SC candidates with a minimum qualifications of HSSLC/SSLC or equivalent examination passed in a single sitting with Mathematics, Physics, Chemistry or 10th pass + (2 years ITI) or (10+2) + (2 years ITI) as a subject in consideration for direct admission into Second year (Third Semester) through Lateral Entry for undergoing 2(two) years Diploma Course in Handloom & Textile Technology commencing from September 2023 at the Indian Institute of Handloom Technology, Jawahar Nagar, Khanapara, Guwahati.

Necessary detailed information and prescribed application forms may be collected from the office of the Directorate of Industries & Commerce (Dev. Branch, First floor), Nagaland, Kohima during the office hours. The last date for submission of form is on or before 26th May 2023. No separate calling letter will be issued.

(A. Temjen Jamir)

Director of Industries & Commerce

J&K kübok Rajouri nung kiralongrartemi Army 5 pokseta südaktsü

New Delhi, May 05 (Agencies): Hokolbarnü Jammu & Kashmir nung Rajouri district kübok Kandi arem nung kiralongrartemi bomb ka pokdaksüba lendong nung army pongu süogo; army ana iba tesem nungjisa asü aser army asem yirua tesülen meküzmükteti asü.

Army Northern Command-i sangdong ka ajanga, Kandi arem nung kiralongrartemi aliba osang lazükba sülen May 3 nü kiralongrartemi mita aoba operation tenzükba liasü aser

Hokolbarnep 7:30 ako meta army team kati kiralongrartem ajuru, ta metetdaksü.

Raraba tesem jagi sepai tali yoksemtsü tuyuogo aser yirua alirtem Udampur nung aliba Command Hospital-i anir oa yaridar, ta parnokisa metetdaksü.

Brihostibarnüa Baramulla nung Jammu & Kashmir Police, Army (29RR) aser Sashastra Seema Bal (SSB) sepaitem senteper kiralongrartem mita aodang Lashkar-e-Taiba (LeT) den tesendaktep aliba kiralongrar ana khaseta liasü.

"Kiralongrar anaji Shopian nung alir Shakir Majid Najar aser Hanan Ahmad Seh na liasü ta jangjaogo," ta army sangdong ajanga metetdaksü.

Mongolbarnüa Shopian nung Jammu & Kashmir Police aser security forces sepaitem senteper kiralongrartem mita aodang Lashkar-e-Taiba (LeT) telok den yariteper ka khaseta aser pa ket nungjagi prangpong aser injang angu. Iba nisungbaji Daramdora, Shopian nung alir Bashir Ahmad Wani'er jabaso, Tanveer Ahmad Wani liasü, ta jangjaogo.



May 05, 2023 nü Sudan linük nungi India nung anir aruba sülen tangokba noksa nung angur. Operation Kaveri kübok tang tashi nung India nung 3,000 dak tema anir aruogo.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONUPII 06, 2023

Sempadaksütsü o jembiba

Alima nung kin o kin na aser telok o telok na tsükchitepa lendong atalokba ya ajungbena ataloker masü saka ibai kenü nisung kati nisung kar nem kar sempadaksütsü asoshi jembiba ajanga adoker. Ibai per entsü nungi techanu moktetter amai lir. Küm 80 shi jakdang, Germany nung Hitler-i anir Germany senso kümer alir Yihuda nungertem Germany nung mali küma samatsütsü tenzükbaja ajungbena atalokba mapa ka masü, saka Hitler-i Germany nunger nem Yihuda nunger samadaksütsü asoshi jembiba jembiba shitak küma atalokba liasü. Aji oda, tanü tashi Hiltler lenisüba nung Germany nungertemi Yihuda nunger lakh roker shi reshikangshia südaktsüba tatalokba otsü amabo alima konga kodanga matalokdang. Ibaji kenü nisung kati tesempa o jembiba tenzükbaja nungi atalokba liasü. Iba amajisa mesüaka asenok rongnunga asen alidak yimer o yimer na rongnung mesüra telok o telok na tsüngda meputep adoka tarak kettepa rarateptsüsa atalokba lendongtem indang bilemdangra, item ajakji mapang talangka nungi kati ka majung jembiba mesüra tsüraburtemi tanurtem dang tangar majung indang ashiba ajanga ataloktem asütsü. Ashiko, tanü Manipur nung atalokba lendong yaa yashi yakanü lokti senden aliba agi atalokba masü saka mapang talangka nungi kini kin anema jembiba nungi tesempatep adoka tenzükbaja asütsüa akok. Aji oda, kodang tsüraburtemi pei tanurtem dang tangar kar majung indang shidir, tanurtem jagi item dakji tajung kecha mangutsü aser sempa tenzüksü. Kasaji, lokti nung lenir aser yimsüsürtemi kodang nisung kar indang majung jembipet jembidir, par nübortemi itemji sempaa aiter. Aji oda, kari kar majung jembir aser karia kar majung jembir ta jembiba jembiba telok ana tsüngdaji tesempatep adoker aser taküm samatsütsüa mapayui rara tenzüker. Kasaji, akhidang Germany nung yimsüsüri Yihuda nunger sempadaksütsü jembiba ama tanü asen lima nunga yimsüsürtemi aiben tangar kin aser tangar tamangba yimsü amangertem sempadaksütsüsa jembiba asenoki angashir. Ibaji metetsümonga nübortem mulungjung nung tsükchiteptsü metsü prokba mapa ka lir. Nübortem rongnung sempateptsü metsü prokbaji tangar tamakok ngudaksütsü asoshi bilema jembir asütsüa akok, ajisüaka nübortem rongnung sempatepa alitsüsa metsü tamajung prokba jagi tamakok dang nungibo takoksaba lendong tuluba ataloktsü aser iba takoksa lendong nungibo shinga mejenbutsu. Aji oda, tsükchiteptsü metsü prokba jagibo tejembisangjiang lendongi aitsü. Talisa, India lima ama kin aser oshi zünger mezüngma aser alima nung nisungtemi amangba tamangba yimsü ajak alidak lima nung lokti lenir aser yimsüsürtemi kodang tamangba yimsü kati ka anemtsüsa aser kin kati ka anemtsüsa jembidir, ibaji India nung rongrong tulu adoka India telongjem raksatsü asoshi sentong yanglu tenzüker asütsü. Ano, tongtibangsa Naga lima ama nung, Naga nunger kin tapu balala aika alidak kin kati kin ka sempatsüsa jembira, iba jagi Naga nunger meputep tenzüksü aser tesempatep shisatsüji kanga mejungi ulua kümerbo, Yisua amadoker, asenok o asenok na azü tokshia rarateptsü ana nung dang lir. Iba ama lendongji asen lima nung mataloktsü atema, talisa, yimten lenirtemi nübortem rongnung tesempa o mejembitsüla. Aiben asenoki shisa tasen tajung ka bener arua lemsateptsü melen tangar majungba kisung jembir. Atangji, tangar majungba indang jembitsübo temela saka yangji nübortem asoshi tagitsü kecha mali, iba jagi nisung mulungang menentsür. Aji oda, asen lima mejungi lira aji yanglushitsü atema shisa tasen agi sentong tasen bener arua nübortem den shisalemsateptsüsbajiang lenirtem asoshi tongtibang asütsüla. Socrates-i ashir, " shisa tulu adeneri shisatsü (ideas) lemsateper, shisa teyari ka adeneri tatalokba otsütem indang jembir aser shisa tila adeneri pi indang jembitsür."

OLEMSABANG

TZÜMAR MATSÜNGDANG ASENOK YA OKORA LIASÜ

T. Meren Paul, Kohima

(Yashi adok nungi...)

Okora ji nüji pur dang ajaba oshi masü saka kecha memetet mashi malur dang ajar, ano karh ibo suwar danga ajar saka Nagini jibo o tamajung jembiba masü. Assamese nungeri asenok dang Okora ta ajaba ama asenokia tzü adena or alirdem dang Merier ta küm aika jaa aruogo. Merier tetezü ya tamajung masü tajung sür nung asenoki tamajung len atsünga amshir. Merier ya nukmeremba mapa, asen dang ashi tangar bo asen ama mekümdaktsünüba, English nung jealousy, saka nukmiba len masü. Asenoki jembiba otsü, asenok ajak anüluleni aotsü Tzüla apu aür agi temdang aser asenok tama apuji ajanga ao aser asenok ajak ajangtemer külen asen sülen alirdemji marudaksütsü atema aür apuji lepzüka yok aser tesülen alir ji marudaksü anungji parnoki nenok tang aor na? taaser tejashi nung parnokjaginai ni merrier ah na? ta ayimoktsü, aji oda tesüsaba langtepba o ji "Merier" aser onokbo taor ta shia pilaa aoaji oda asenok oadoker dangji Aor ta aser doktsür aor dangji Merier ta aja ta Dr. S.N. Majumdar kaket nungji zülua angur. Merierojangji nukmerem mapa ta sayubaji asenoki parnokji asenok den marudaktsünü saka parnoki bo asenok sülen arunüa nukmi. Asenok apusoa arubaji Chungliyimti nungi aru aser tang Chungliyimti nung alirdemji Sangtam-er alir, anungji asenoki anünga doktsür arurdemji tang aliba Chungliyimti nungerya asü masü, parnokia par tetsü tebu süren otsü komala ka jembir, lanurdemi tesendaktep ali asü mali bushitsüngdangtsüla.

Onok Langpangkong nungerbo Phom nunger kidanger tinu temba aika lir aser Akhoya nungerbo Yajem-er den akhi tzürapur mapang mangko kümtep koba dang onoki "Mangpa" ta ajar tanü tashi medoktsüi amshia arur, anungji parnok karh den sensaksem dang "merier" ya tetezü tajung nung amshiba indang rateta ashi. Idangji parnoki "nungar masüar" tetezü tajungji nenok Aor-i tamajung nung amshirar, nenok Aor chanu shir neptzü pangtzü yima süoshi aser temang memerük lidir itemdangji nenoki merier chanu ang mesüker ta jembiba ya koda? talangzü. O tajung saka asenoki tamajung bangpettsü amshiba jagi tetezüji mejungi kümdaktsür. Küm aika ABAM ia Ken Kaket nung ken ka, English hymn Br.H: 35 "From Greenland's Ice Mountains" ta alibaji Ao nung "Meri Moyar Tsuiner Li Arem Nung Alirtem" ta meyipzüka aden. Küm aika yamaji amshiba asenoki asen taiji meteta kumer külen "Par Asen Tzürapurtem Aremnung" ta Ao Ken Kaket Ken No. 147 nung 1970 küm melenshia meyipzüka ojangji yanglushi, saka anotangbo Ao Ken Kaket tasenba Ken No. 441 nung ojangji "Naga Lima Tenem Kin" ta melenshia yangluogo. Ao oshi nung asen meketa aliba kin rogo dang asenoki; Assam lenden nung alir dang Tzümar ta ajar, Lotha nunger dang Tsüiner ta ajar, Sema nunger dang Moyar ta ajar, Chang nunger dang Mojunger ta ajar aser Tzüla ayong adener anüdoklen alir tanüngba kin ajakdang Merier ta ja-a aruba ano küm aikabo mesüi. Tzümari asenok dang okora ta ajabaji asenoki manganüba amaji anüdoklen alirdem dang asenoki merier ta ajabaji parnokia manganür ta asenoki rajemdi aser tang Assam nungeri okora ta ken adenbaji asenok asoshi tangatetrsü aser tansütsü mapang tajung südaktsüdi ta lemsateper.

Dal ajanga high blood pressure noktangter

Source - University of Manitoba, Canada



Chi chiyongdang dal (lentils) dena chiyongra blood pressure ajema kümdaktsür ta bushitetba osang tasen ka metetdaktsüogo.

Canada nung aliba University of Manitoba-iba ya bushidangba nung dal achiba ajanga arishi küm inloka aodang blood pressure talila akümba timtem noktangtettsü.

Parnoki koya nung tendanga research agidang dal achiba ajanga temang nung azü blood vessels nung temelenshi adokbatem meyiptsüba bushitet.

"Iba ya kanga dang tesüngmangtsü kechiyong dal achiba ajanga mozütem mamshii blood vessel mapa meinyakaba jungdaktsür" ta bushidangertem rongnung Dr Peter Zahradka-i metetdaktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur nung tensa majungba atema tebilemtsü akar: NBCC



Manipur nung Tenla ki ka rongdoktsüba sülen tangokba noksa nung angur.

Kohima, May 05 (TYO): Manipur nung Tenla kitem aser rejutem rongdoktsüba aser raksatsüba den külemi nisung asüba aser raraba tensa atema Nagaland Baptist Church Council (NBCC)-i jashir aser tebilemtsü akar, ta NBCC Tir, Rev. Dr. V. Atsi Dolie-i sangdong ka ajanga metetdaksü.

Tang Manipur nung tensa mesüngjemetba ajanga nisung aika kongshir; tanurtem, tantsür-tamburtem aser shirangertem danga maochir, aser iba ya ajanga teraksatsüba tulu bener arutsüogo, ta NBCC-i metetdaksü.

"NBCC-i Manipur sorkar aser Centre sorkar na dang

tang tensa azüoktsü atema tekaraba nung inyaktüsü mepishir. Onoki sorkartem dang iba tensa ya jungjunga azüoktsü aser aibelenertem nem temerenshi agütsütsü atema mera agia inyaktüsü mepishir," ta sangdong nung shia lir.

"Onokisa Manipur nung aliba nüburtem dang süngjemtsü aser mangatetep ken otem junga bentettsü atema maongka agütsütsü mepishir. Rara aser teraksatsüba ajanga timtem dang tali bendenloktsü. Teti atema ken otem bentettsü atema lenmangji yimjung nung ken o jembiba dang lir," ta sangdong nung shia lir.

"Tatamsa onoki NBCC

kübok Baptist Arogotem dang tang tensa tajungtiba nung bentettsü atema sarasademtsü ayongzüker. Tsüngremi iba tensa ajanga kongshia alirtem aneptsütsü, yimjung aser tesünep agütsütsü atema sarasademtsüba den külemi ken o jembiba nung shilem agirtem nem shisa tajung agüjang ta sarasademtsütsü ayongzüker," ta NBCC-isa metetdaksü.

"Tang ama tensa ka nung NBCC-i Manipur nung alirtem nungiter aser iba tensa ya mita repranga atatsü. Tang tensa tajungtiba nung bentettsü atema ajak longjemer inyaktüsü NBCC-i ayongzüker," ta kasa sangdong ajanga mepishia metetdaksü.

India nung Arogo lenirtemi Centre dang Manipur atema teyari meshir

May 05, 2023: Manipur nung rara tulu adoka nisung 12 astüba den külemi Tenla kitem rongdoktsüba sülen India nung Arogo lenirtemi Centre sorkar dang nungi teyari meshir.

Item tatalokba sülen May 4 nü state sorkari curfew ozüing benokogo aser iba ozüing alema inyakerem dak injang khaloktsütsü tetuyuba agütsüogo.

May 4 nü osangbener den jembidang Manipur Baptist Convention Center nungi Rev. Zuankamang Daimai-i, "Iba tensa mazüokteti kümogo. Onoki Centre sorkar dang tangsa tiyongtsüi ia inyaktüsü mepishir. Yamaji meinyakra Manipur nung alirtemi tesüiba mapang kodanga matalokdangba aika ataloktsü ni

tsüba bilemtsür," ta shia.

"Tesüiba anogo ana tsüngda Tenla ki 50 dak tema bensatsüogo aser Khristan 5,000 dak tema jenshiogo. Khristantem aoksaogo aser tesünep atema sarasademdar. Iba tensa ya tamajungba dang kümдар," ta Rev. Daimai-i ashi.

Rev. Daimai ya Manipur state yimtiba, Imphal nung alir.

Meiteis nung ya teimbaka Hindu nungertem lir, aser tanemer teloktemji lisopurtem lir. Parnok teimbaka hill districts nung alir Khristantem lir. State nung nütsüing million 3.5 lir aser nütsüing shilem 40 bo tribal lir aser iba nungjagi shilem 41.29 Khristantem lir.

Daimai-i, "Curfew ozüing benokba sülen yangi

Khristantem tetsüba nung alir. Meitei teloktemi parnok ozüing bangdakpurtem ama inyaker, ibayongji nütsüing ajema aliba teloktem tsübur," ta metetdaksü.

Bangalore nung tongti putir, Peter Machado-ia sangdong ka ajanga Manipur nung Khristantem anema inyakra atema tebilemtsü katsür, ta metetdaksüogo.

May 5 nü osangbener den jembidang Peter Machado-i, "Manipur nung Khristantem reshikangshiba atema onoki tebilemtsü katsür," ta metetdaksü.

Linük nung Khristantem anema inyakra nokdangtsü atema pai Supreme Court nung temepishiba ken o ka benoka lir.

USCIRF-i State Dept. dang CPC nung India züngoktsü mepishi

Washington, Monupii/May 05 (Agencies): Taküm agi küm pezübuba atonga United States Commission on Independent Religious Freedom (USICRF)-i US State Department dang India linüki tamangba yimsü temeden anema inyaker, anungji iba linük ya "country of particular

concern" (CPC) nung züngoktsüla, ta mepishiogo.

India nung Centre, state aser local sorkartemi tamangba yimsü dak sendakba nung bendanga züngshiba mapatongtem benoker aser ajungkettsür, ta tai tonglokja USICRF-i State Department dang India ya CPC linüktem

rongnung züngoktsü mepishiba den külemi ketdangsertem US-i aruba nokdangtsü mepishi.

USCIRF-isa US Congress dang ken otem angadanga, osangbenertem den jembiba aser Congressional delegations nung India nung yimsü temeden onük süoka jembitsü mepishi.

ANOGO ABEN TSÜNGREM DEN

Timtem Anogotem (T.ken 102: 1-11)

Taküm nung asenoki tarutsü sentong aika yanglur aser ajak ataloktsü ama imlaa alidang, timtem adoker aser teraksatsüba agi semdang. Na sentong ajak tai leni aor ama bilemdang iba ken ya züngang. "O Kibuba, kü sarasadem angashianga, aser teyari asoshi ni ayimtenba na tonga arudakjang. Kü timtem anogo nung kü dang nungi ne jak atsüka telima: kü dangi ne narong shijang; ni ajaba anogo nung kü dang yakta langzüangma" (t.1,2). Kechi ama anogo ka ken züluri ajurua liasü? Timtem anogo ka. Pai pa rongjena aliba ozü ka den medemdanga ashi. "Arem nung pelika ozü ama ni lir. Ni amua maor, aser kilem manung rongjena aliba alushijak ama küma lir" (t.6,7). Yamaji pai bilem- pa kilem manung ozü ka kija aliba ama pai bilem. Pai kilungi ir kar den telungjem kanü, saka pa kija liasü.

Ken züluri tsükchirtem pa anasa aru (t.8). Saka timatempa anogo aser atalaba anogo nung pai ashi, "Tsüngrem taochi ajanga ni iba anogo melenshitsü." Aser ibai sarasademba anogo ka akümtsü. Pai kechi bilem aser angu aji pai Tsüngrem dang ashi. Pai ayimten, "Tsüngrem, nai dang mapatem melenshitsü akok." Tsüngremi na asoshia mapatem melenshitsü akok. Pai tema tensa-tiaji memelenshitsü akok, saka Pai ne mulung nung bilemba melenshitsütsü akok. Idangji timtemba anogoji takok anogo agi melentsü akok.

Ajak timtemba anogo ka lir. Kodang tensa tia agi na menüpdir aser timtem na meketa arudir, Kibuba dang sarasademang. Pai timtemji koda takok agi melentsütsü metetta lir. Nai imlabalen nungi Pai ne sarasademtem melangzüaka, Pai pa sentsüwangshi asoshi ne dang tajungtiba inyaktüsü.

Myanmar nung court-i Baptist pastor ka bail temepishiba magizük



Pastor Dr. Hkalam Samson

May 05, 2023: Tang sepaitemi jaimsütsü Myanmar linük nung aliba court kati Baptist Pastor kati bail nung chioktsü mepishiba magizük.

Hopta pezü tejaklen pastor Dr. Hkalam Samson pua liasü. Pa apuba sülen anogo ka dang lirbo tepuokdak alir meyirjang ana dak tali chioka liasü.

Kachin state nung aliba Myitkyina Prison Court-i May 2 nü Dr. Hkalam Samson-i bail atema mepishiba magizük, ta pastor atema lawyer-i metetdaksü.

Osangbener den jembidang pastor atema lawyer-i, April 7 nü kasa court-i pastor küm 6

jail nung puoktsü obendang agüja liasü, ta metetdaksü.

Pastor Samson ya taoba mapang Kachin Baptist Convention (KBC) nung lenir liasü.

Arrshi küm 65, Samson ya Kachin Baptist Convention nung küm 12 tashi president aser secretary inyaka liasü aser maneni KBC nung adviser inyaker.

Amnesty International-i sangdong ka ajanga, Myanmar nung Samson densema tim masüba nung nisung meyirjang aika tepuokdak ayuba atema tebilemtsü akar, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Pungmang

(n) amui aoba mapang anguba (dream)
* Yasüing pungmang nung ni na ajuru.

Pungmen

(n) tereprangtetsü ayak mesüra tarak (blemish)
* Yimteni yimsüsür nem sü pungmen maket ka bushia agütsü.

OLONG PAITEP # 6506

1			2		3		4		5
6					7				
					8		9		
	10								
									11
					12		13		14
15								16	
17									
					18				

TIPLÉN

- 1. Tebilemba bangjemtep -6
- 4. Senshi -4
- 6. Arem shiruru ka -4
- 7. Aou tapu ka -6
- 10. Külemi ka akümba -9
- 13. Sobu-solemtsü -6
- 16. A _____ ong -4
- 17. Per tulu ka -4
- 18. Naro tong nungi agizük -6

LANGTSÜNGLEN

- 1. Tzüküm nung anguba li -5
- 2. Ase _ _ _ _ g -2
- 3. Onsara -4
- 4. Te _ _ _ _ pa -4
- 5. Lenmang ajurutepdak -6
- 8. A _ _ _ a -4
- 9. Pei meyong aküm -3
- 10. Shiruru ku -6
- 11. Teki -5
- 12. Tebu aküm -4
- 13. A _ _ _ _ ü -4
- 14. Tekong nung enokba -4

OLONG PAITEP # 6505 TELANGZÜBA

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

TIPLÉN :


- 1. Telok, 4. Aluru, 6. Ozüing,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

NAI-A YA METETTER MA



1889 nungi 1994 tsüingda küm balala nung Coca Cola pongdang balala melenshia aruba idagi noksa nung angur.

Noksa nung meputepi aliba 10 bushiang



Cachar district nung Manipur nung aika jenoka lir



Manipur kübok tesem ka nung mejangjatetba nisungtemi gari ka rongdoksür aliba angur.

Guwahati, May 5, 2023

(Agencies): Assam Chief Minister Himanta Biswa Sarma-i Cachar district administration dang Manipur nungi jena arurtem yaritsü atema tetuyuba agütsüogo.

"Manipur nung tawa lendong atalokba ajanga kibong aika Assam nung arua jenoka lir. Ni Cachar District Administration dang item kibongtem yaritsü mepishio" ta CM Sarma-i ashi.

Sarma-isa ashiba agi pai Manipur chief minister N Biren Singh den osangtsüsangi maneni agitepdar.

"Ni CM Biren Singh den osang agitepdar aser Assam sorkari iba ama tensa ka nung akokba tashi yaritsü shiogo" ta paisa metetdaksü.

"Nisung aika parnok

kinunger kidangi ogo aser kinunger malirtem anenzüksü asoshi mapa inyakdar. Community halls aser schools nung nisungtem anenzükettetsü" ta Cachar deputy commissioner Rohan Kumar Jha-i ashi.

Nübortem nem chiyungtsü aser tzü agütsütsü, ta DC Jha-isa ashi. Manipur nungi nisung 500 jungnüa tetsüba agi Cachar district kübok Lakhipur nung arua lir, ta Lakhipur Sub-divisional police officer Dinesh Kumar-ia ashi.

Parnok teimbaka ayong ajanga aru aser kar kinunger kidangi ao, kar arogotem dangi ao. Manipur nungi nisungtem maneni arudar aser tarurtem indang list ka renemdar, ta SDPO-isa ashi.

"Manipur nungi arurtem nem akokba tashi teyari

agütsütsü. Nisung ajaki yimjung nung alitsü aser ketdangsurtem den yariteptsü mepishir" ta Lakhipur BJP MLA Kaushik Rai-ia ashi.

Manipur nungi arur aika Lakhipur kübok yimtsüing ka indang community hall nung jenoka lir ta osang angazüker.

Brihostibarnü Cachar superintendent of police Numal Mahatto-i Lakhipur nung ketdangsurtem aser Manipur nung lennirtem den senden ka amen.

Manipur nung atalokba ajanga Lakhipur / Cachar nung tensa meraksatsü atema SP Mahatto-i senden nung ayongzük.

Barak Valley nung district asem rongnung Cachar ya ka lir aser Manipur kübok Jiribam district den arrtsütepa lir.

Meghalaya nung PDF MLA 2 NPP nung adener

Shillong, May 5, 2023

(Agencies): Meghalaya nung People's Democratic Front (PDF) MLA anati National People's Party (NPP) nung adentsü.

May 6, 2023 nü tenati NPP nung adentsü ta May 5 nü General Council senden nung lemtet.

"PDF MLA anati Honibarnü National People's Party (NPP)

den lokteptsü" ta PDF President aser Sohra MLA Gavin Myllem-i ashi.

Iba ajanga Meghalaya Legislative Assembly nung NPP MLA 28 akümtsü aser absolute majority atema menden 3 dang nüingdaksü.

PDF MLA anaji Banteidor Lyngdoh (Mawkynrew) aser Gavin M Myllem (Sohra) na lir. PDF MLA temi NPP nung

adenba ya May 10, 2023 nü Sohiong assembly menden atema election asoshi kanga tongtipang lir.

United Democratic Party (UDP) candidate Horju Donkumar Roy Lyngdoh ajungbena asüba ajanga February 27 Assembly elections nung Sohiong assembly maden. Donkumar ya taoba minister aser UDP lennir liasü.

Chakma council elections nung BJP candidate ka tepset



Amit Kumar Chakma

Aizawl, May 5, 2023

(Agencies): Mizoram nung Chakma Autonomous District Council (CADC) elections atema BJP candidate ka tepset aser nisung 6 yirua lir.

Tasüsang ya BJP candidate Amit Kumar Chakma ta jangjaogo aser iba lendong ya Lawngtlai district nung atalok.

Brihostibar aonung Amit Kumar Chakma-i Lokhisury

yimtsüing nung nüboyima senzüdang nisung kar nok amer pa amak

Pai Rengkhshya constituency nungi BJP ticket amer tokteptsüba liasü aser pa idakjisa asü. Iba dak sendakba nung nisung ka pua lir.

Mizoram state election commission-i ashiba nung ajemdaker District election officer-i Rengkhshya constituency nung polling masütsü tetuyuba agütsüogo.

Mizoram BJP MLA Dr BD Chakma-i iba tatalokba atema bushisüingdang ka asütsü takhangba agütsüogo.

"BJP official MDC candidate Amit Kumar Chakma asüba osang angashia ni aoksar. Yasüing Lokhisury yimtsüing nung nüboyimba mapang nisung kari pa amak. Ni iba tatalokba atema bushisüingdang ka asütsü aser aibelener apütsü

akhanger" ta Mizoram BJP MLA Dr BD Chakma-i ashi.

Mizoram BJP-ia iba tatalokba aitsüogo aser asür kinungertem den mangyimba osang lemsatepogo.

May 9, 2023 nü agitsü aliba Mizoram kübok Chakma council election nung candidates 73 lir aser May 11 nü votes azüingtsü.

MNF, BJP aser Congress nungi candidate metsütsü (20) lir aser ZPM-i menden 13 nung tokteper.

Vote enoktsür tetsür 17,677 dena nisung 35,885-i polling nung shilem agitsü. Mizoram nung Chakma lisopurtem asoshi CADC ya 1972 küm Constitution nung Sixth Schedule kübok tentet.

CADC nung menden 24 lir aser iba nungi nominated seats 4 lir. Yaküm December ita nung CADC ya Governor rule kübok lir.

Serbia nung ano nisung ter jungnua tepset

Belgrade, Monupii/May 05 (Agencies): Belgrade south tsütsü jila ka nung prangbong bona alir kati gari nung mener süyisübonger dak injang khaloktsüba mapang nisung ti asü aser 14 yiru, koba Serbia nung hopta ka tsüngta tanaben ataloker alitsü.

Bodhbarnü school ka nung tanur ti aser security guard ka khaseta sülen Brehostibarnü menur iba lendong ya atalok.

Asürtem nem akum agüja Serbia nung Hokulbar nungi tenzüka asemnü mang ayimer.

Brehostobarnü lendong ya linük yimtiba, Belgrade nungi south tsütsü mile 30 shi pilar Mladenovac jila anasa ataloka liasü.

Sorkar meyong RTS television ajanga ashiba agi, temolung melemi alir arishi küm 21 tain nisung kati Dubona yimtsüng nung school anasa mezüng injang khalokja police ka aser pa adianu tetsür ka den dangartem khaset.

Iba sülen nisungba ya anasa

aliba Mali Orasje aser Sepsin yimtsüngtemi ao, ta RTS ajanga ashi.

"Onoki nikongdang prangbong ola angashi aser ni aji fireworks alitsü mesüra tanurtem asayamenür alitsü ta bilem. Iba ama ataloktsü ta ni khenyongi bilema meliasü," ta Dubona nung alir kati ashi.

Temolung melemi alisang ya ghonda aika bushia senzür police temi Hokulbarne apu.

Police temi ashiba agi, nisungba ya lendong atalokba tesem nungi mile 56 shi pilar Kragujevac yimti anasa apu.

RTS ajanga ashiba agi, temolung melemi alisang ya par kinunger ka kidang apu aser pa ket nung hand grenades pezü aser ozüng alema nok-nü aser injang aika bona liasü.

Serbian Interior Minister Bratislav Gasic-i iba ya kiralongraba mapa ka lir ta ashi.

Lendong atalokba tesemi ambulances, special police aser helicopter unit tem yoka liasü.

Bodhbarnü Belgrade yimti

tiyong nung aliba Vladislav Ribnikar primary school ka nung arishi küm 13 tain tebur kati tebu indang prangbong amshia school tanur ti aser security guard ka khaseta liasü.

Asürtem rongnung tanur ka France senso liasü, ta France indang foreign ministry ajanga ashi.

Europe nung prangbong timtiba amshiba linüktem rongnung Serbia ya ka lir, kong 1990s mapang rara nung amshir anüngba prangbong aika lir.

Ajisüaka iba linük nung prangbong amshitsü ozüng tesashi lir aser tang atalokba lendong ama kanga bulua mataloker - tesüsa 2013 küm rara nung tejen sepai kati yimtsüng ka nung nisung 13 khaseta liasü.

Brehostibarnü ketdangsür temi prangbong azüoktsü ozüng tesashiba amshir aser police-i nüburtem dang nok-nü shibanga ayutsü aser tanur nungi pila ayutsü ajungshia liasü.

Wagner Group sepaitem Bakmut nungi anizüker aotsü: Yevgeny

Moscow, Monupii/May 05 (Agencies): Russia indang Wagner Group tekolakbai injang tsütsü mangatetep adoka Ukraine nung Bakmut yimti nungi Bodhbarnü tashinung par sepaitem anizüker aotsü amokmeren.

Pai video ka nung par sepai tasümg anasa jaja defence ketdangsür dang prangbong aser injang tali meshiba sülen ano pai iba sangdong ya agütsü.

Russia-i iba yimti ya ita aika nungi amokbangtsü meranga arur, saka iba yimti amokbangba nungi tajangzük angutsüba mejangjai lir.

Yevgeny Prigozhin-i iba telemtetba agiba ya defence ministry dak tongloktsü.

"Shoigu! Gerasimov! Injang kong lir?... Parnok yagi volunteers ama aru aser ner jenjang aketba office nung nenok melemtsü asoshi asür."

Prigozhin ain adokdang aiben Defence Minister Sergei Shoigu aser Chief of the General Staff Valery Gerasimov dak rangloka liasü.

Prigozhin ya nungtugu akumtsü meranger aser tawa pa sentsü ajema akumer amai ajiteter. Taoba mapanga pai amokmeren o jembia aser meinyak aser itemji asayamenü ama kumdakja liasü.

Taoba hopta ang pai Russia nung rara bukumer blogger ka dang Bakmut nung Wagner fighter tem injang anogo ishika atema dang lir aser injang meyirijang aika nungdaker ta shia liasü.

Injang agi anüngba ya maziüoktetra par taa yong sepai mapa inyakertem meyiba

shilangtsü mesüra asütsü, ta shia liasü. "Iba sülen asen bureaucrats temi aginüba kecha mongui laotsü."

Bakmut atema raraba joko ita aika arur aser iba mapang nisung meyirijang aika takum samar alitsü südi ta amanger. Wagner troops aser Russian sepaitemi Ukraine mitkartem den rarar.

Ukraine-i tashi ajak amshia iba yimti kumzuka ayutsü telemtetba agi, aser ibai Russia nung mitkartem rongsen ajunga kangabo tongtipang masüba tesem ka nung indokdaksütsü meranger amai lir.

Russia nung Mongulbarnü Victory Day mungdaksütsü asoshi par sepaitem Bakmut nung May 10 tashi alitsü molungogo, ta Prigozhin-i ashi.

February ita nunga pai par sepaitem tasümg noksa prokshi aser army tanishirtem tenüng sena liasü.

Mitkar temi asaa Wagner group injang agi anüngdaksür masü ta shia parnoki front line nung injang-bomb tali agüja liasü.

Par sepaitem jakdak nokdaker tang tesüsa sangdongba nung, May 10 nü parnok Bakmut nungi defence ministry indang unit temi yoktsüsa akumtsü aser tanüngba Wagner tem pei zübu menaktsü asoshi logistics camps temi aotsü, ta Prigozhin-i shia liasü.

Wagner-i tang tesüsa injang agi anünger ta ashishiba ya Ukraine-i meyiper amaktsü ta mapang talangka nungi imla aruba atema Russia indang

defence ministry-i injang-bomb bendeba ayuba mechi amai angateter, ta US nung aliba military analyst Rob Lee-i ashi.

Ministry-i tongpang ajungalen kumzuka ayutsüla aser Prigozhin-i Bakmut agitsü atema dang bilemer, ta pai Twitter nung zülutsü.

Prigozhin-ia Ukraine nung temi May 15 nü nungi tenzüka meyiper amaktsü ta takzua lir, kechiaser tanks aser artillery tem tzüngsang takong nung ang tajungba amshitetsü.

Ano külem Prigozhin-i tawa ang logistics chief mapa nungi anentsür alisang army general ka anioka lir amai ajiteter.

Col-Gen Mikhail Mizintsev-i taoba küm Ukraine south tsütsü rongnendak Mariupol yimti nung bomb poklokja amakba ajanga pa dang 'butcher of Mariupol' tenüng jalokja lir.

Online nung video prokshiba nung pa Wagner training camp ka nung angu aser Bakmut nung Wagner sepaitem aliba tesem sema liasü.

Taoba mapang Prigozhin-i pa nem Wagner commander ka indang deputy mapa agütsü aser par telok nem injang agütsütsü asoshi akok tashi tajungtiba nung yaritep aser tepuokdak alirtem telok nung shimokba nunga yaritepa liasü, ta ashi.

Col-Gen Mizintsev ya taoba küm September ita army logistics ketdangsür kumdaksü aser mapang tatsüka lir Prigozhin ya Russia nung tepuokdak tesem ka nung oa yangji alirtem dang Ukraine nung par telok tenzükra tepuokdak nungi chiochtsü, ta shia liasü.

AO STUDENTS UNION CHUCHUYIMLANG TOWN

TENÜNGSANG AGÜTSÜR



Wabong Lt. Chubanungba Jamir aser Watsü Rongsenmongla na jala Watsü Dr. Latonglilla Jamiri Open Recruitment to Teaching Posts under Nagaland University nung takok tajung ngua, Department of Environmental Science nung Associate Professor jenjang nguteta khonang nüngsang bener arutsüba asoshi Ao Students Union Chuchuyimlang Town ajanga tenüngsang aser tetushi agütsür.

Teyanglur Tsüngrem maneni la wadang moajangma.

Sd/-
Masatemsu
President
Ao Students Union
Chuchuyimlang Town

Sd/-
Yangertuba
Secretary
Ao Students Union
Chuchuyimlang Town

Pelaba Lemsateper



ASO
8.8.1948

ASÜ
1.5.2023

Onoki teti meima aliba ojala Asür TIAYANGLA PONGEN (CHANGKI), shirang yipten nungi tenzüka akümüli wadang tatempang anogo tashi ozü kibong mulung zürepa taku marok ajemba mapang, shirnokisa ana aser talang nungi arua nenok sarasadem nüktzü, rongsen aser nübu agi yaritepogo, ajak den pelaba lemsateper. Khrista tanaben maru tashi nenok temeim sayuba onoki kodanga mamatsü. Ozü-i nenok ajak dang tsüngtong arua pelaba meshitetaka asen teyanglur Tsüngremi moajangma ta ozü sarasadem.

-Temeim kinungbo, Jabaso aser Kinungtsu, Semchir.

MULUNGNEN O

"Tarutsü mapang, tepela talubosa aliba alima ka nung, asenok tanaben ajuruteptsü"



ASO:
01.11.1939

ASÜ:
26.04.2023

Tsürabur Asür N. Senkameran Ozukum, ajungben akümüli wadang tembang arudang shirnokisa ozü asüku mangyim tulu mapang lenla balala talisa nübu den rongsen, shisatsü aser sarasadem agi nungita yaritepa aruogo, nenok ajak dang ozü mulungnen O lemsateper.

Nenok temeim, aria bilem mapatem ajanga ozü khuret pungbadakja süneptsüogo. Item mapa tulu ajak nenoki ozü nem agüjaka ozüi nenok ajak dangi tsüngdong marutetba atema sasaseta bilemer. Ajioda süaka ozü sarasadem nung asen Teyanglur Tsüngremi nenok ajak moajang ta mepishir. Ajak dang maneni kangasa pelar.

-Temeim Kinungtsü, Chirnur aser Kinungertem.

MPL 2023: Vanguard Old Boys temi takok angu



Kohima, Monupii/May 05 (TYO): Morning Football Club Unity Football Club ajanga IG Stadium, Kohima nung ayongzüka aliba Morning Premier League (MPL) 2023 asayamung nung Hokulbarnü Vanguard Old Boys temi points asem nguteta liasü.

Ita pezü asayatsüba MPL mezüng hopta atema asaya

tatembang buba nung Vanguard Old Boys temi Merhülietsa Football Club nem goal 10 agüja liasü.

Iba asaya nung Anguzo-i goal asem agütsü aser Sanen aser Tapitu nati goal ana-na agüja liasü aser ano Mor, Imli aser Thanpenlo nungeria goal ka-ka agüja liasü.

Hopta atem dang iba

asayamung nung Secretariat United FC ya temaba jenjang nung lir aser Vanguard Old Boys ya tanabuba jenjang nung lir.

Brehostibarnü asaya ka nung Morung United ajanga GethemGo Football Club nem goal toku agüja liasü. Iba asaya nung Theja-i goal asem agütsü, Stephen, Lipok aser Burakum nungeri goal ana-na agüja liasü.

Nagaland Inter-College Basketball Championship anogo melenshir

Dimapur, Monupii/May 05 (TYO): Inter-College Basketball Tournament (Men & Women) koba May 8-11, 2023 anogotem agitsü aliba anogo melenshir, ta Dimapur District Basketball Association (DDBA) sangdong ka ajanga ashi.

Iba asayamung ya June 14-16, 2023 anogotem nung JV Rise Foundation Basketball Court, Signal Angami, Dimapur nung alitsü.

Tatidang aliba mechi college aikati DDBA dang

asayamung anogo melenshitsu asungdangba sülen anogo ya melenshitsu akum, ta sangdong ajanga ashi.

Inter College Basketball Tournament (Men & Women) ya Department of Youth Resources and Sports, Government of Nagaland ajanga Dimapur District Basketball Association den lungjemer ayongzüker alitsü.


Iba asayamung nung Nagaland University kübok aliba college ajak aser

Nagaland nung aliba autonomous university tem nungi shilem agitettsü.

Iba asayamung nung senpet (Men & Women) Winner - sen 40,000; Runner-up - sen 25,000; Joint 3rd Place- sen 10,000 (each); MVP- sen 3,000 (each) alitsü.

Iba dak sendakba nung osang tali tejangjaba metettsü aser registration atema 7085994276 mesüra 7005727663 nung tongteprateptsü akok, ta DDBA sangdong ajanga ashi.

Wrestler temi bushisüng dang südaktsütsüla: Anurag Thakur



Lucknow, Monupii/May 05 (Agencies): Wrestler temi akhangba ama ajak inyakogo, anungji tangbo parnoki bushisüng dang südaktsütsüla, ta Union Minister Anurag Thakur-i Hokulbarnü ashi.

Lucknow nung osangbener den jembidang, "Committee ka tentettsü takhangba liasü aser aji tentetogo, Delhi Police-i FIR züluokogo, Supreme Court-ia obendang agütsüogo. Delhi Police-i bushisüng dang maparen shidak inyaktar," ta Thakur-i ashi.

"Parnoki akhangba ama inyakogo aser bushisüng dangba tembangdaksütsü ni asayartem dang mepishir."

Union Sports Minister Anurag Thakur-i mapa kecha meinyaker aser ken o remseptsü meranga committee ka tentet, ta Delhi nung wrestler Vinesh Phogat-i aija liasü.

"Union Sports Minister (Anurag Thakur) den jembiba sülen longkak aitba anen aser athletes ajungai pa dang tim masüba mapa inyakba indang shiogo. Pai ken o remseptsü meranga committee ka tentet aser iba mapang mapa kecha meinyak," ta lai shia liasü.

Wrestling Federation of India (WFI) tekolakba Brij Bhushan Sharan Singh ya tepuokdak mayu tashi maneni longkak aittsü, ta Tokyo Olympic bronze medallist wrestler Bajrang Punia aser ano Vinesh Phogat aser Sakshi Malik ama nungtugi wrestler temi Hokulbarnü shia liasü.

Dimapur DPDB senden nung CCTVs...

(Tapak 2 nungi...)

Iba mapa mapang telatet ka nung inyaksü atema Task Force ka nungdaker aser parnok den administration aser police temi yariteptsüla, ta DPDB chairman-i ashi.

Senden nung Dimapur tebour tajungba kumdaksütsü asoshi jembidang Forest aser Horticulture department ajanga tongti shilem agitsü tim, ta jembia liasü.

Ochishia aser bendanga agütsür inyaksü nükla nung department ajaki ita shia department inyakim/terenlok osang DC Dimapur nem agütsütsü iba senden nung

pangjema liasü, aser iba onük DPDB Dimapur mendenpubai benoka liasü.

Iba dak sendakba nung, asenok nüburtem asoshi alir asünung department balalai scheme mapa kuma inyakba nüburtemi metettsü tim, ta Advisor Hekani-i ashi.

Advisor Tovihoto-i ketdangsurtem dang Dimapur nung aliba nüburtem tenzükba ya maongka ka ama agitsü ayongzüker aser nüburi nungdakba mapang ajak nung renema alitsü ajungshia liasü.

Pai ketdangsurtem dang DPDB senden nung mapang

shidak amshitsü aser teti adentsü ayongzüka liasü.

State nung Dimapur ya tongtipang district ka lir, aser state tarutsü jenjang yangluba district ji Dimapur ya asütsü, anungji ketdangsurtemi lungjemer Dimapur tejakleni anir aotsüla, ta lai ajungshia liasü.

Iba senden nung school tem upgrade asütsü, Grant-in-aid, Nagaland University kübok Para medical & allied lapoktsü aser CMHIS registration indanga jembia liasü.

Senden nung Team Dimapur ajanga inyakshiba osang power point dener agüja liasü.

Test team rongnung India temaba jenjangi tuogo

Monupii/May 5, 2023 (Agencies): Tan ICC test ranking sayaba nung India-i Australia ajateta temaba jenjangi tuogo. Australia team Test asaya nung temaba jenjang nung ita 15 liasü aser tang linük ana tsüngda June ita World Test Championship (WTC) final asayatsü lia India temaba jenjangi tuogo.

Official rankings annual update nung 2019-20 season nung result tem magi akümer aser 2020 küm May ita nung tenzüka asayabatem apir ranking agütsür.

Iba tetezü 2019-20 nung India-i New Zealand 2-0 agi makokba joko ojang dang züngshir aser Rohit Sharma-i aniba team yagi point 121 nguteta temaba jenjang

tongtetogo. 2019-20 nung Pakistan aser New Zealand na akokba mezüngshi akümba sülen Australia point 116 dang kümogo aser iba den Ashes asayamung nung England 4-0 agi akokba ya-a annual exercise nung tesadang dang agir.

Captain Ben Stokes aser coach Brendon McCullum na lenisüba nung England team-i test asaya 12 nungi 10 koka lir aser parnoki point 114 nguteta tang tasembuba jenjang nung lir. Kasa mapang nung T20 ranking nunga India team world champions England jakdang temaba jenjang nung lir.

India aser Australia na June 7 nü nungi tenzüka Oval nung World Test Championship (WTC) final asayatsü.

Küm 33 sülen Napoli-i Serie A takok ngutetogo



Naples, Monupii/May 05 (Agencies): Napoli-i Serie A akoktsü mapang talangka nungi ataba tatem kati aruogo aser puti otsü kaket nung iba club indang 'icon' asür Diego Maradona den külemi züluokogo.

Brehostibar aonung Udines den asayadang 1-1 draw asüba ajanga Napoli nungertem küm 33 ataba point nguteta Udine nung, Naples nung aliba Stadio Maradona aser southern Italy indang yimti tulutiba meketa benjong tenzüka liasü.

1987 aser 1990 nung Maradona-i anir akokba sülen Napoli-i iba Serie A asayamung nung takok mongudangi lia aru, saka second half nung minute 52 buba nung Victor Osimhen-i nungdaka aliba goal agüja liasü. Asaya tenzük half-time tashinung Sandi Lovric-i Udines asoshi goal ka agütsür liasü.

"Pa den medem dangtsü, Maradona sülen captain ka ama Scudetto ajungketsü ya, tepang agi merasateter. Ibai kü meyong masü, ibai asayar ajak aser asen mangdang asangsang akumtsü asoshi inyakba nisungtem meyong lir," ta Napoli captain Giovanni Di Lorenzo-i ashi.

Parnok Naples-i meyiba shilang dang temolung shiranga

agizütsü, kong Deobar nikonkdang Fiorentina den masaya tashi maneni benjongtsü sentong lir.

Napoli asoshi ibai Serie A title asem ben buba akoker alitsü aser parnok ano asaya pongu asayatsü anünga liaka parnoki takok anguba jangjaogo.

"Neapolitans nungertem pelaba ngua parnoki bilemba meteter. Takum nung timtem ajangshidang item nisungtemi iba jenjang nung reprangtsü. Iba amai benjongtsü parnok dak temeden lir. Parnok nem tepela bener arutsüogo ta meteta na temolung nung anisungzütsü," ta Napoli coach Luciano Spalletti-i ashi.

Taoba mapang Napoli-i iba asayamung takok anaben nguteta aliba ya Argentina nung Maradona mapang liasü.

Iba sülen club ya senotsü nung timtem ajuru, tekübokba jenjangi alu aser sentsüh agi tsübanga akum.

Parnoki tesüba season 11 nung Coppa Italia asem ben koka liasü, saka Napoli fans temi Scudetto ang aginüa liasü.

Tangbo parnok asoshi asayar tajung aika lir, aser item rongnung Nigeria nung forward Victor Osimhen lir, shibai league games 26 nung goal 21 agütsütetogo aser ano Georgia winger Khvicha Kvaratskhelia-ia goal 12 agütsüba den den assists 10 lir.

Roma nungi anaben tashi Coppa Italia takok angusang arishi küm 64 tain Luciano Spalletti ya Serie A akoker manager tambutisang kumogo.

Points table nung tanabuba jenjang nung aliba Lazio dang points 16 agi timba lir asünung, Napoli asoshi Serie A title asem buba jangjaogo.

BILEMDANGANG
"Nai yashi inyakbaji tuluka ama reprangra, tanü nai kecha meinyak."